

## Manman doudou

Manman doudou

Manman lavi

Manman latè

Ou sé fondas a lanmou

Tras é chimen divini

Ou sav fè mizè vwè mizè

Chanjé lapenn an diridou

Pòté klètè an gran nwèsè

Manman doudou

Manman lavi

Manman latè

Ou vwè maladi gaté vayan

Tann lapli chayé limon

Kouté banbou chanté anba gran van

Vibwasyon a'w menm olwen ni bon son

Mé an doukou a gran jennès a'w

Jou an vwèjou

Ou hélé soukou

Sé mal ou mal bat kat a'w

A fout ! Manti a mantè !

Potomitan sé halé mizè

Manman doudou

Manman lavi

Manman latè

Men léjè é bouch anmè a papa gyango  
Ka miganné bèl bo é bobo  
Mandé padon pou géri bòs  
É pou dèmen sipétadyé  
Sé bèlòt é rèbèlòt ajékontinyé

Konmen sonmèy an pa pasé  
Kouché si divan lasal  
On ti soulyé koré douvan pòt a dimi- bann  
Ka kouté on mouch volé  
Paré pou tann é sispann  
Alavòl vyé kou ka bay bal  
Toupiti kon an yé

Konmen fwa  
Konmen wouklé dèyè dézòd  
Douvan Ochansité a granvéra  
Maché kochi a sémafòt  
Ou bésé zyé, woubay kòd  
An pran ba'w, ou pran ban mwen  
Magré tèt a klou an nou té ka tòd

On vyé doulè ki chouké fon  
Afòs séré ka fè pichon  
On litani a vyé lidé  
An zyé a vou ka fifiné  
Mandé Bondyé tanprisouplé  
On dènyé souf pou vwayajé

Annou woté soulyé maché atè  
Pou santi manman latè  
Manman lavi

Manman doudou

Ka koulisé an venn an nou

É menmsi lanmou an labou

É menmsi dlozyé pa ka las glinsé

An kè an mwen ou byen planté

On grenn lèspwa ja ka tijé

Soufrans dèyè ja fin mannyé

An filao lapli pa ka tonbé

Manman latè

Manman lavi

Manman doudou

Toni Mango, manman doudou, janvyé 2021